

四庫全書

子部

# 欽定四庫全書

子部

小兒衛生總微論方卷一

二

詳校官太醫院恩糧臣袁天錫

編修臣倉聖脈覆勘

總校官進士臣繆珙

校對官中書臣李斯咏

謄錄監生臣馮國柄

欽定四庫全書

子部五

小兒衛生總微論方

醫家類

提要

臣等謹案小兒衛生總微論方二十卷不著撰人名氏凡論一百條自初生以至成童無不悉備論後各附以方前有嘉定丙午和安大夫特差判太醫局何大任序稱家藏是書六十餘載不知作者為誰博加搜訪亦未嘗

聞此書之流播因鋟於行在太醫院以廣其傳按宋錢乙仲陽以治小兒得名其藥證真訣一書僅有傳本亦不免缺略其他如晁陳二氏所著錄者有兒童寶鏡小兒靈秘方小兒至訣小兒醫方小兒斑疹論諸書皆不可得見是書詳載各症如梗舌鱗瘡之類悉近時醫書所未備其議論亦篤實明晰無明以來諸醫家黨同伐異自立門戶之習誠保嬰

之要書也此本為明弘治己酉濟南朱臣刻  
於寧國府者改名保幼大全今据嘉定本原  
序復題本名臣序又稱得之醫者鄭和和稱  
得之古冢中其說迂怪蓋方技家自神其授  
受亦無取焉乾隆四十三年五月恭校上

總纂官

臣紀昀

臣陸錫熊

臣孫士毅

總校官

臣

陸

費

墀

欽定四庫全書

欽定四庫全書  
提要

小兒衛生總微論方原序

余先君有小兒衛生總微論方二十卷家藏甚久今六十餘載矣不知作者謂誰博加搜訪未嘗聞此書之流播也自嬰孩初育以至成童所謂保衛其生總括精微視古今方書極為詳盡仁哉著書者之心也宗族親舊間幼稚有疾余每口傳指授効如影響又取其可以通用於大人者增湯劑而用之尤為神異豈此書不言之妙有待於余而發耶烏可掩為一家之寶而不與人共

之於是集二三同志訂正其騰寫之舛鋟於行在太醫局以廣其傳得此者敬而用之當知余言不繆或未免畫蛇添足之譏不暇顧矣吁齊魯大臣史失其名恨不得詳其人也嘉定丙午立春日和安大夫特差判太醫局何大任序



欽定四庫全書

小兒衛生總微論方卷一

醫工論

凡為醫之道必先能明理以盡術而後能用藥以對病  
如此則事必濟而功必著矣若不能明理以盡術則豈  
能用藥以對病不能用藥以對病則豈能愈疾今冠於  
篇首以勸學者

凡為醫者性存溫雅志必謙恭動須禮節舉乃和柔無

自妄尊不可矯飾廣收方論博通義理明運氣曉陰陽  
善診切精察視辨真偽分寒熱審標本識輕重疾小不  
可言大事易不可云難貧富用心皆一貴賤使藥無別  
苟能如此於道幾希反是者為生靈之巨寇

凡為醫者遇有請名不擇高下遠近必赴如到其家須  
先問曾請未曾請師即問曾進是何湯藥已未經下乃  
可得知虛實也如已曾經下即虛矣更可消息參詳則  
無誤矣又治小兒之法必明南北稟受之殊必察土地

寒溫之異不可一同施治古人最為慎耳

稟受論

人稟父母精血化生故內經有曰陽施陰化謂之有子  
聖經言方其受授之初一月血凝二月胚胎兆三月陽  
神為魂四月陰靈為魄五月五行分五臟六月六律定  
六腑七月七精開竅八月八景具全九月氣足象成十  
月百神集備至日滿而生也又云一月如珠露二月若  
桃花三月形象成四月男女分五月府藏具六月筋骨

全七月魄生而動左八月魄長而動右九月三轉身十月足而生此未知其所出其始有謂之妊者以其陽始而陰任之也有謂之胚者以其未成為器而猶坯也有謂之胞者以其已為正陽而陰包之也有謂之胎者以食於母而為口呂也有謂之娠者以其有時而動也有謂之懷者以其有身而依也原夫此衆者皆陽始陰任在有形之先次由五行而後化成也故曰陰陽具而五行立矣且陰之所任者壬也一陽壬兆則人乃肇生命

門主生氣之原精所藏焉壬陽水也合丁之陰火而生  
丙故有命門然後生心心主血神所藏焉丙之陽火合  
辛之陰金而生庚故有心然後有肺肺主皮毛魄所藏  
焉庚陽金也合乙之陰木而生甲故有肺然後生肝肝  
主筋魂所藏焉甲為陽木合己之陰土而生戊故有肝  
然後生脾脾主肉意所藏焉戊為陽土合癸之陰水而  
生壬故有脾然後生腎腎主骨志所藏焉故腎與命門  
一也此陰陽五行夫婦生化自然之理也人之賦稟自

受氣至胎化自成形至生養亦皆由焉

初生論

兒纔生出母腹中急當舉之便以綿絮包裹抱大人懷之溫暖雖暑月亦不可遽去綿絮須漸漸減去之蓋乍出母腹中不可令冒寒也又急以綿裹手指揩拭兒口眼中及周圍穢血皆令盡淨不可令入口眼也若舉遲失於包裹則令兒中寒若穢血得入口眼則令兒生病

其証候方  
論並在後

## 回氣論

兒纔生出母腹中哭聲遲者急以葱白細鞭其背呼父  
小名即啼又兒纔生下氣欲絕不能啼者必是難產或  
冒寒所致急以綿絮包裹其兒頓放大人懷中溫暖若  
已包裹須更添之令極溫暖且未得斷臍將胞衣置炭  
火上燒之仍撚大紙脚盛蘸油點著於臍帶上往來徧  
燎之以臍帶連臍得火氣由臍入腹故也更以熱醋湯  
捋洗臍帶須臾則氣回啼哭然後如常洗浴斷臍此法

甚良救者甚多

洗浴論

兒纔生下須先洗浴以蕩滌汗穢然後乃可斷臍也若  
先斷臍則浴水入臍而為臍瘡等病及浴水須入藥預  
先煎下以瓶貯頓臨時旋煖用之不犯生水即佳并已  
後浴之亦用藥煎湯揀所宜時日則大良矣凡浴宜用  
寅卯酉日若初生不值但於日中選此三時如時亦不  
值唯忌壬午丁巳癸巳日時大凶而與避之餘皆可也



今具煎湯用藥下項

用猪膽汁湯浴兒則不患瘡癬皮膚滑澤用金銀  
虎骨丹砂煎湯則癬邪惡去驚單用虎骨亦得用  
李葉切半升煎湯則解肌熱去溫壯用白芷二兩苦  
參三兩挫碎煎湯則去諸風用葫蘆葱白葫麻葉  
白芷藁本蛇床子煎湯退熱用苦參黃連猪膽白  
芡杉葉栢葉楓葉煎湯去風用大麻仁苓陵香丁  
香桑甚藁本煎湯治諸瘡用金銀桃奴雄黃丹砂

煎湯則辟邪除驚用益母草煎湯治疥癬諸瘡

凡煎湯每用水一斗入藥煎至七升去滓適寒溫用之冬不可太熱夏不可令冷須調停得宜乃可用之兒自生之後須依時洗浴以去垢污又不可數數若都不洗浴則皮皺毛落多生瘡疥凡洗浴時於背上則微微少用水餘處任意即不可極淋其背亦不可久坐水中則引驚作病切須慎之如常能依法用之令兒體滑舒暢血脉通流及長少病無不驗也

## 斷臍論

兒生下須當以時斷臍若不以時斷臍者則令臍汁不乾而生寒為臍風之由斷臍之法當隔單衣以牙咬斷之將煖氣呵七遍若用刀斷之須用剪刀先納懷中煖透然後方用不得使用冷刀多致傷臍生病宜切戒之其斷臍帶當令長至足趺或云當長六寸若太短則傷臍令兒腹中不調若太長則傷肌令兒皮枯鱗起纔斷臍訖須用烙臍餅子安臍帶上燒三壯炷如麥大若兒

金匱要略卷之二十一  
未啼灸至五七壯灸了上用封臍散封裏之法須槌治  
帛子令柔軟用方四寸許上置新綿厚半寸及上置藥  
末適緊慢以封之如不備其藥即用極細熟艾一塊置  
於上封之但不令封帛緊急急則令兒吐乳又須常切  
照顧勿令濕著及襁褓中亦不可令兒尿濕恐生瘡腫  
及引風也

烙臍餅子

豆豉

黃蠟

各一分

射香

少許

右以豆豉為細末入射研均鎔蠟和劑看大小捻作

餅用

封臍散

雄鼠糞

七枚兩頭尖者是

乾姜

大甑帶

鷄子許三味同燒灰

綿灰

兩半

別燒稱

緋綿灰

別燒稱半分

胡粉

三錢炒黃

射香

少許

右同研極細末每用半錢至一錢傅臍上封之永不

患臍瘡腫如已因風濕患瘡腫者看臍帶落與未落

依此用藥便差

兒已封裹臍了一切如法得數日許忽然怒啼似衣中有刺者此乃臍燥還刺其腹故也當與解之易去故帛藥物更換裹之如無此證亦於十日許解視換時須避風冷若遇冬月左右置火於溫暖處換之至於尋常換衣用粉亦當如是若失於照顧致傷臍患者具方于後

治小兒初生臍未落時腫痛水出

右取故緋絹燒灰研細末傅之

治小兒臍中汁出不止赤腫

右以白石脂為細末炒令微煖傅之日三四

治小兒臍瘡

右以甌帶燒灰研細末猪膏和傅或以桑白皮汁傅

乳上吮兒飲

又方以東壁上土傅之治歷年不差者伏龍肝亦得

又方以當歸為細末傅之久不差者用之神效

治赤腫或膿血清水出者

又方以馬齒莧葉燒灰研末傳之或以露蜂房燒末傳之

又方以乾蚶蚶火煨為灰研末傳之佳

又方以黃蘗為細末傳之治久不差者

治小兒臍赤腫

杏仁

半兩猪頰車骨中髓七錢半

右先研杏仁極爛和髓傳之一方研杏仁如脂和體

中膏傳



治小兒因剪臍傷外風致臍瘡久不乾

白礬 煨 白龍骨 煨等分

右同研為細末傳之少少用如無兩味但得一味亦可

又方以綿燒灰研為細末傳之新舊皆可

治小兒臍瘡濕不差若至百日即危極胡粉散

胡粉 一錢細研 乾姜 燒灰一錢細研 白石脂 燒存性稱一錢細研

右同為細末每用一字或半錢傳上

凡小兒患臍瘡未愈不可乳令太飽太飽則令兒臍風

相視壽夭論

兒生下洗浴斷臍之後當視其壽命長短成人不成人  
兒生身不收者死 兒生魚口者死 兒生股間無生  
肉者死 兒生汗血者死 兒生頤下破者死 兒生  
囊下白或赤者皆死 兒生陰不起者死 兒生身如  
凝血若無皮者死 兒生臍小者不壽 兒生聲絕而

復揚急者不壽 兒初生目自開者不成人 兒初生  
頭四破者不成人 兒初生啼聲散者不成人 兒初  
生身軟如無骨不成人 兒初生啼聲深者不成人  
兒初生頭毛不周匝不成人 兒初生汗出不流不成  
人 兒初生小便凝如脂膏者不成人 兒初生常搖  
手足者不成人 兒初生枕骨不成能言而死 兒生  
膝骨不成能倨而死一云尻骨 兒生掌骨不成扶伏  
而死 兒生踵骨不成能行而死 兒生臙骨不成能

立而死 兒初生陰大而與身色同者成人 兒初生  
臍中無血者成人 兒初生啼聲相連延屬者壽 兒  
初生卵下縫通達而黑者壽 兒初生身體鮮白而長  
大者壽 兒初生額上有旋毛者妨父母 兒初生目  
視不正數動或哭而豺聲者非佳人 兒初生髮稀少  
者不聽人教

初生服藥論

兒初生出母腹揩拭口眼淨洗浴了斷臍畢裊包訖且

未得與乳當用好甘草一中指節許擘碎以水三蜆殼煎二蜆殼以綿纏指蘸與兒吮之若吐出惡汁為佳若服二蜆殼不吐即無穢物不須更服也此法不問兒虛實壯怯皆須服之次看形色若面色紅潤啼聲響快者用擘破黃連以湯浸取濃汁調硃砂末抹兒口中打盡腹中舊糞方可與乳又法以永粉半錢旋旋吮兒良久臍糞乃下為佳故聖濟經云凡兒初生惡血未納者拭以綿指吞而在胃者吐以甘草入而在腹內者利以

黃連永粉皆所以草污穢也次用好硃砂一大豆許細研水飛煉蜜一蜆殼看稀稠和膏分三劑每用一劑乳汁化時時滴兒口中三日內服盡即止姚和衆云成煉硃砂能溫腸胃壯血氣也一日只可一豆許勿得過也分三次用次用真牛黃一大豆許細研以煉蜜酸棗大和成膏每用一大豆許乳汁化下時時滴兒口中姚和衆云能去驚辟邪惡之氣若兒形色不實怯弱者不宜服之如胎熱或身體色赤黃者宜多服此法在三日外

也

中寒論

兒纔生舉遲或斷臍晚者令兒冒冷故寒中之也又先斷臍後洗浴則水氣得入之或洗時水氣所干亦為中寒之候其證腹中絞痛天絛啼呼面青黑尿清白當以當歸末為粉著于絮上炙而熨臍腹日日頻熨至啼止臍乾為度仍不可炙令大熱恐引驚也

初生不乳不小便

初生洗浴斷臍襌包草穢污下臍糞都了經日不飲乳及不小便者此因難產或包裹舉遲中寒或被風邪微干傷動臟氣所致有此候者多為撮口治不可稍緩通關散治初生兒不飲乳及不小便

以石銀器中貯妳汁二合入四破葱白一寸煎取一合藥注子分灌之服盡立效

臍風撮口

兒自初生至七日內外忽然面青啼聲不出口撮唇緊



不能哺乳口青色吐白沫四支逆冷乃臍風撮口之證也此由兒初生剪臍不定傷動或風濕所乘其輕則病在皮膚而為臍瘡不差其重則病入腑臟而為臍風撮口亦如大人因有破傷而感風則牙關噤而口撮不能入食身鞭四肢厥逆與此候頗同故謂之臍風撮口乃最惡之病也千金有曰小兒忽患臍風撮口者百無一活皆坐視而斃良可憫惻有一法極驗但世罕有知者凡遇其患則看兒齒斷上有小泡子如米狀急以溫水

蘸熟綿子裹手指輕輕擦破即口便開而安

又方視小兒口中上下斷間若有白色如豈大許便以指甲於當中搥之自外達內令匝至微有血出亦不妨又於白處兩邊盡頭亦依此搥令內外氣斷不必直破入指甲矣恐太甚則傷兒此二法相類子母秘錄云於搥破處以蜈蚣末傅之大良及有治方集之後凡兒產時諸物但令開口勿閉以厭撮口口噤也

治小兒斷臍之後不慎照管致風濕所乘令兒不能乳

哺名曰臍風宜速療之不久則為撮口也

當歸

去鬚半兩洗焙

天漿子

去殼三個微炒

亂髮

一錢燒灰

右為細末入射香一字許時時傅臍

又方

黃蘗

劉

釜下墨煤

亂髮

燒灰存性

右各等分同為細末用一字或半錢傳之

治小兒臍瘡不差因風傳變欲為撮口或為發癰者

金兩黃散

川黃連

去鬚一分為末

胡粉

一錢研

龍骨

一錢煨紅研

右同為細末每用少許傳之時時用

治小兒剪臍中風唇青撮口吐白沫四支冷

定命散

赤足蜈蚣

半条酒炙令乾

川烏頭尖

三個生

射香

少許

右為末入射研勻每服半字煎金銀薄荷湯調灌

治小兒初生撮口

蛇脫皮

一分微炒

鈎藤

一分

乾蝎

稍

一分

已上

硃砂

一分

別研

分

飛射香

半錢別研

真牛黃

半錢

別研

右同研細拌勻再研每服一字取竹瀝一兩點同乳汁調灌下一方只用蛇蛻硃砂射香各一分每用半字津調塗口中日五七次

又方以鹽豉置臍上炙之

又方以夜合花枝濃煎汁拭口并洗

又方於兒口傍先利令見血碎雀甕汁塗之

又方生搗鼠婦并雀甕汁相和調塗抹口中漸漸乳得効鼠婦乃濕生虫也

胎中病論

兒自生下至一臘前後有病者多是未生之前在母胎妊之時母食毒物胎有所感至生下之後毒氣發而為病又有母於娠妊之時失於固養氣形勿充疾疚因之故聖濟經言病生於中者與生俱生也今敘于後

梗舌 兒纔生出母腹因與揩拭口中惡物便子細看兒口中如有皮膜似蘆葦管中之膜裏定兒舌或連舌根者此名梗舌乃胎毒所攻而生或母於娠妊時愛食

飛禽之物感而所致便須急以指甲刺破剥去之揩拭  
血淨用燒白礬灰細末傅半菽豆許若不摘去則梗其  
舌而不能語令兒啞也及日數多亦不能去也

氣閉 兒初生一兩日間有大小便不通腹脹滿而欲  
絕者此胎毒之氣鬱閉所致也便急令一婦人用溫水  
先漱口了後吸啞兒前後心并臍下及手足心共七處  
各五七次以赤紅色為度須臾氣散則自通矣不爾即  
無生意也有此候用此法可謂再生

鵝口 兒自初生至七日內外因胎毒上攻於舌上生白屑如米連口兩角生黃瘡及舌下有膜如石榴子大令兒聲不發者名曰鵝口

治小兒鵝口保命散

白礬

一分燒

馬牙硝

半兩研細

硃砂

一分水飛乾

研細

右同研勻細末每用一字取白鵝糞以水攪取汁調之先以手指纏亂髮揩拭兒舌上口角頰中去垢穢淨然後用藥傅之令遍纏髮揩時以井花水沾用或



以綿纏指頭沾粟荻汁用

治小兒鵝口不能乳

以馬牙硝研細遍搽舌上下兩頰口角內外患處日

三四次

又方以桑白皮汁和胡粉傅之

又方以雞脰中黃皮燒灰研細乳和傅之

又方以白鵝矢汁灌口中

又方以黍米汁傅之

又方以全蝎七枚先用薄荷汁浸過後用薄荷七葉裹之文武火炮過焙令乾研末更入黃丹同研勻細熟蜜和為膏傅病處

垂癰 兒自初生至七日內外因胎毒上攻血氣不斂兒口中上嚔連喉舌生物如蘆穰盛水之狀或作疱在懸癰之前塞其氣路不通令兒危殆名曰垂癰又兒生下即死者多此病也人少知之當急視之凡遇是病便以指甲摘破或以綿纏長針留尖如粟米許刺之令兒

氣泄則活其疱破則出青黃血水便用帛子搵拭及用  
鹽湯蘸帛握揩令淨若入喉即傷兒慎之慎之如一刺  
復作者再刺

治垂癰如聖散

鉛霜

一分  
研細

真牛黃

一分  
研細

大陰玄精石

一分  
研細

硃砂

一分

研細水  
飛日乾

右件再同研勻入白龍腦細末半錢相和每用抄一  
字至半錢搽兒口中

重嚔重斷重舌 兒初生至七日內外因胎毒上攻於  
兒口中若發於嚔上作腫作兩重之狀名曰重嚔若發  
於上下齒斷兩傍腫如疊斷者名曰重斷若發於舌上  
腫起初更生一小舌者名曰重舌腫悶作痛令兒多啼  
不能哺乳而妨礙

治重嚔重斷

右以蛇蛻皮燒灰研細末傅之

又方治如前

右以生蒲黃末傅之

烏鰂骨散治重舌腫悶妨礙吮乳

烏鰂骨

一兩

乾蟻

半兩

蒲黃

半兩

研 枯白礬

一兩

右和研如粉每用半錢以雞子黃調塗腫上嚥津不  
妨

又方治如前

右以蛇蛻皮為末乾捻傅舌下患處不一時便消不  
能飲乳者用之得飲或以雞羽蘸淳醋展藥掠舌下

金匱要略卷一  
又方以木蘭皮長一尺廣四寸削去麁皮以醋一升漬之取汁注患處

又方以伏龍肝研細末牛蒡汁調傅或以衣魚塗舌上  
又方以馬牙硝末塗舌下日三

又方以三家屠肉切如指大以摩舌上

又方以黃丹豆許納管中吹舌下

又方以蒲黃傅之不過三次差一方微炒以紙鋪地上  
出火毒研羅細末先用溫水蘸帛裏指輕輕按掠後

摻藥

又方以桑白皮煮濃汁塗乳上吮兒

治重舌妨悶欲死

右以亂髮燒灰研細末以傳舌下頻頻用或燒簸箕皮傳上

又方治如前以鹿角炙適溫熱熨之或如米粒大安舌下

又方以小豆煮汁和鹿角灰傳之日三或以赤小豆末

醋和傅舌上

又方以露蜂房燒灰研細末醋和膏傅之

蓐瘡 兒自初生至七日內外因胎毒攻發身生瘡者  
名曰蓐瘡謂在產草上生瘡也

治蓐瘡

右以黃連為細末先用生麻油塗瘡子內將黃連末  
遍摻油上倒合在鉢三脚子上下用艾葉火熏令極  
乾刮聚再入生油膩粉各少許和膏傅之



又方以澤蘭心細嚼傳之

又方以葵根燒灰傳之

治小兒初生三日頭面生瘡緣起身體壯熱多啼

升麻

柴胡

去苗石膏

各一分

甘草

當歸

去鬚各半兩

右咬咀每服一錢水半盞煎至二分去滓時時與量

兒大小加之

治小兒初生蓐中生熱瘡

右以雞子五枚敲破去白只取黃又以亂髮如雞子

黃許二味相和銚子中煎熬取汁塗之更用苦參末  
傅之甚奇劉禹錫云頃在武陵生子瘡內便有熱瘡  
發於臂腿蔓延半身初用他藥無益狀候至重晝夜  
啼號不乳因閱本草有云亂髮合雞子黃煎消為水  
療小兒驚熱下痢注云去痰熱百病又雞子本草云  
療熱瘡因用之立效如神煎法雞子黃亂髮初入銚  
煎時甚乾少頃髮焦遂有液出旋取置一磁碗中以  
液盡為度

口噤 兒自初生至七日內外忽口噤不能乳腹急多啼下青黑糞或口生瘡如粟米名曰口噤此證牙關急而口噤與撮口相似然撮口證面色青啼聲不出口吐白沫比口噤證面色赤而多啼口不吐白沫所以異也此緣兒在母腹中時為風熱傷胎所致故聖濟經曰風熱傷胎生而口噤也

千金云赤者為心  
噤白者為肺噤

治初生兒口噤不開不收乳立聖散

乾蜘蛛

一箇去足口取新竹瀝一  
中蛻殼浸一宿炙焦為末

乾蝎稍七箇

為末

膩粉

錢一

右同研勻細末每服一字乳汁調滴兒口中時時用  
又方以鹿角粉大豆末等分研細乳和塗乳上以兒吮  
服

又方以生甘草一分細剉水一盞煎至六分去滓放溫  
分數次灌兒口中令吐出痰涎穢物後取猪乳汁點  
兒口中差亦治撮口

又方以真牛黃少許研細淡竹瀝調一字灌之次以猪

乳滴口中

又方以赤足蜈蚣去足炙黃為末以猪乳調半錢分三四次溫灌之一方同雀甕不開口者五枚燒灰研細末飲調服一字

又方以白殭蚕二枚為末蜜和傅兒口內如無以原蚕鵝二枚炙黃代之亦治撮口

又方以雀矢白水和圓麻子大乳服二圓雞矢白亦佳一方雞矢白棗大綿裹水五合煮二沸分服

治小兒口噤體熱

右以青竹茹三兩醋一升煎取三分之一溫分數服  
治小兒口噤牙闕不開

右以天南星一箇煨熟急用紙封角莫令透氣却以  
紙裹近上尖處翦一竅子雞頭大令熱氣出於鼻孔  
中熏之牙闕立開亦治撮口

軀啼 兒自初生已來身色青白無血色好啼哭晝夜  
不止身體仰而軀夜則甚腹滿不乳大便青白晝夜啼

諸藥不效者此名軀啼乃兒未生已前在胎胞中時為風冷傷而所致故聖濟經曰風冷傷胎生而軀啼千金有云小兒有胎寒則腹痛軀啼時時吐衄或腹中如雞子黃按之如水聲便沒沒而後出不急治多變為癇治小兒胎寒軀啼養藏湯

當歸

去蘆  
一兩

沉香

丁香

白朮

桂心

川芎

各半

兩

右為細末每服一錢水一盞姜二片煎半盞去滓滴

兒口中

治小兒忽患腹痛夭矯汗出者亦胎寒也

出千金

右以黎葉煮濃汁七合分三四次服

又方以當歸為末每用一小豆許乳汁調下日二夜一  
病兒大添之

又方以栢子仁為末每服一錢半溫水調下

治小兒胎寒軀啼發癇礬石圓

右以馬齒礬火煨半日為末棗肉和圓黍米大每服



一圓乳汁送下量兒大小增損以差為度有痰亦去

神良

兼腹脹不嗜食大便青黃色

血癖

又名胎積

兒未生之前在母腹中藉母經血以滋

養焉至生下時須拭去口中惡血及用藥下盡兒腹中

穢血之糞方纔飼乳若於生時揩拭兒口中惡血不淨

吞嚥入腹或腹中舊有穢糞不曾下之或下之不盡因

而成癖故名曰血癖又名胎積至生下百日內外兒生

頭瘡眼目赤澁小便如血口中氣急身體紫色腹脹躁

金匱要略卷之三  
煩多啼不乳

治小兒血癖胎積丸

白丁香

二十箇輕粉

半錢

滑石

半錢

乳香

半錢

巴豆

三十箇針串燈  
上燒焦微存性

右為末糊丸黍米大每一二丸看虛實大小與服煎  
柳心七箇湯放溫送下連一二服糞下惡物是效亦  
令乳母服和氣藥調養飼兒若兒服藥後吐不止大  
便不通面黑氣喘者死

胎赤 兒自生下至開眼已後眼兩眥及臉眶赤爛名曰胎赤此因兒生時稍難留帶時久或不慎照顧致惡血入於兒眼又或生下時揩拭兒眼邊惡血不盡亦令入兒眼漬浥以生是病不急治之則至長不差

治小兒胎赤眼二金散

黃連去鬚一錢 黃蘗一錢

右先為麤末用妳汁同浸一宿焙乾收之每用少許以新綿裹荊芥湯浸之放溫時時頻洗

金匱要略卷一  
胎驚 兒在母腹未生之前因有所驚胎內感之至生下百日以來兒心神不寧睡臥不醒壯熱躁煩啼哭無時上視發搐面青腰直撮口縮腮糞青黃水者此名胎驚方論著於驚疾門之中

胎怯 兒自生下以來面無精光肌肉脆薄大便白水身無血色時時哽氣多噓目黑睛少羸羸多哭此胎怯也宜天麻浴湯治之

胎肥 兒生下肌肉厚遍身血色紅潤至滿月以後漸

漸肌瘦目白睛粉紅色五心熱大便難時時生涎此胎肥也更看父母肥瘦肥不可生瘦瘦不可生肥治亦宜天麻浴湯

胎熱 兒生下血氣時叫哭身壯熱如淡茶色目赤大便黃赤糞稠急食乳此胎熱也治亦宜天麻浴湯

治小兒胎怯胎肥胎熱等諸疾天麻浴湯

天麻二錢 蝎尾去毒為末 硃砂末各半錢 白礬末 射香一字

烏蛇肉酒浸去皮焙乾為末 青黛末各三錢

金匱要略卷一  
右為末勻每服三錢水三碗桃枝葉五七條煎十數沸帶熱浴之勿得浴背湯須適溫熱用

治小兒胎熱或乳母飲食麤惡辛苦乳汁不起兒色如淡茶黃色瘦瘠不為肌膚四支痿躄繚戾服之充悅健壯

芍藥

二兩半

柴胡

去苗二兩

鱉甲

茯苓

去黑皮各一兩半

人參

去蘆

大黃

各一兩

甘草

乾姜

各半兩如熱即用枳實

右為末煉蜜和丸大豆大百日至一歲兒服一丸乳

服日二量兒大小增減

胎不治病

胎內十二證 一雙瞽 二隻眇 三駢拇 四六指  
五體殘 六支廢 七獨腎 八瘡啞 九缺唇  
十社老 十一攣拳 十二侏儒

胎外十二證 一睛凸 二近覩 三鼻鼽 四耳逆  
五結喉 六項癭 七舌短 八節彈 九龜背  
十駝背 十一膝並 十二交脛

小兒衛生總微論方卷一



欽定四庫全書

小兒衛生總微論方卷二

五氣論

兒自胎孕以至生成皆稟五行而生五藏故自五氣以生五態而各不同聖濟經言五行孕秀有異宜五態委保有殊氣沖和均賦體性潛異者蓋母氣胎育有盛衰之虛實故其子生也有剛柔之勇怯又經云心氣虛而語晚肝氣微而行遲脾氣弱而肉瘠腎氣怯而解顱如

此之類悉皆是矣然五藏之氣稟受殊異其於怯弱者  
聖人亦有方藥以補養之矣

心 心氣盛者則伶俐早言笑形神清而多髮心氣怯  
者則性癡而遲語髮久不生生則不黑心主血髮為血  
之餘怯則久不生也心繫舌本怯則語遲也

治小兒生下無髮

以鮑魚燒灰末和醬傅之即生

治小兒髮久不生菰勝丹

當歸

去蘆一兩

生乾地黃

去苗土一兩

芍藥

一兩已上並為末

芎勝

一合別研

胡粉

半兩別研

右同研勻細煉蜜和丸黍米大每服十粒煎黑豆湯下兼化塗頭上量大小用

又方以楸葉中心子杵爛絞汁塗之

又方以羊屎燒灰淋汁同豉汁洗之三日一次不過十次即生

又方治血熱髮薄不生以桃柳煎湯入猪膽汁和沐頭

髮自生

治小兒心氣不足從小至數歲不能言昌蒲丸

石昌蒲

二錢

人參

去蘆焙  
半兩

丹參

去蘆  
一錢

天門冬

去心焙  
一兩

麥門冬

去心焙  
一兩

赤石脂

三錢

右同為細末煉蜜丸菴豆大溫水下五七丸至十餘  
丸量大小增損日三久服取效為度無時

又方昌蒲

一兩一寸  
九節者良

遠志

甘草水煮  
去心一兩

桂心

一兩  
黃耆半兩

人參

去蘆  
半兩

黃連

去鬚  
半兩

酸棗仁

湯浸去  
皮半兩

右為細末煉蜜和丸如雞頭實大每服一二粒煎生  
姜湯化下無時

又灸法灸心俞三壯灸兩足踝三壯

又方治五六歲不語此心氣不足舌本無力不能發轉  
故也一云風冷傷於少陰以赤小豆為末酒和塗舌  
上神效以社壇餘酢酒與飲少許

肝 肝氣盛者則躑健而早行立肝氣怯者則長不能  
行而脚細名曰鶴膝肝主筋怯則筋弱故長不能行也

又或眉久不生眉屬肝肝氣不榮故眉久不生也何以  
知眉屬肝且五臟皆有毛其髮屬心心為火火性炎上  
故髮生上槍也鬚屬腎腎為水水性潤下故鬚生下順  
也是以女人皆無外腎故無鬚也毛屬肺肺在五臟之  
上而主外故毛生皮膚之外也眼睫屬脾眼輪亦屬脾  
脾在右偏故睫斜生眼輪之上也眉屬肝肝在左偏故  
眉斜生眼睫之上也左為上右為下所以眉在上而睫  
在下也

治小兒從小至數歲不能行麝茸丹

經大驗

射香

研

茄茸

酥塗炙黃

生乾地黃

去苗土

虎脰骨

酥塗炙黃

當歸

去蘆洗焙

黃耆

剉各半兩

右為細末用羊髓二兩煮爛和丸黍米大每服十丸  
摩沉香湯送下乳前日三服

又方羚羊角丸

羚羊角

用尖細節密者剉取末

虎脰骨

敲破塗酥炙黃

生乾地黃

去苗

土焙酸棗仁

去皮炒秤

白茯苓

去黑皮各半兩

桂

去粗皮不得見火

防風

去蘆切焙當歸去蘆切焙黃耆切焙各一分

右為細末煉蜜和劑每用一皂子大食前溫水化下  
日三兒大者加之

又方以五加皮為末飲服之取葬家未開戶盜食哺之  
日三便能起行

又灸法小兒自小至五歲不能行者灸兩足踝各三壯  
又灸法小兒鶴膝脚細不能行者灸膝眼三壯

治小兒生下無眉毛欲得生者



以七月中採烏麻花不拘多少陰乾為末以生烏麻油浸每夜傅之

治小兒眉毛眼睫因癬退不生名乳頰癬

赤芝散

野油花

旋覆花是也

赤箭

天麻苗

防風

去蘆各等分

右為細末先洗癬淨搵乾以好油調塗之後服烏犀丸

犀末

錢一

猪牙皂角

錢二

乾蟾末

錢三

龍腦

少許

右為細末熊膽汁和丸菴豆大每服一丸溫水下量

大小加減

脾虛汗脾氣盛者肌肉厚而色紫耐壯而乳多脾氣怯則肌虛而喜汗汗多則肉瘠脾主肌肉怯則肌虛虛則榮衛衰故汗多而肉瘠也

治小兒脾怯多汗丁香散

陳皮

一兩青皮

去穢

訶子肉

去核

甘草

各半兩

丁香

二錢

右為細末每服二錢水一盞煎六分食前溫服兒小分之

治小兒喜汗香瓜丸

大黃瓜

黃色出種子者

川大黃

濕紙裏煨紙焦

胡黃連

柴胡

去蘆

青皮

去穰

鱉甲

醋炙黃

黃蘗

去麁皮

蘆薈

藥各等分瓜用一箇

右將黃瓜割頂去瓢以諸藥為細末填瓜內至滿却將頂蓋口杖子簽定慢火內煨熟取藥并瓜研之如皮研不爛則去之乾却入麵糊和丸菴豆大每服三二丸乳後冷漿水下兒大加之

粉法

黃連

去鬚

牡蠣

火煨

貝母

各七錢

右為細末以米粉一升同研勻粉身與丁香散同用  
肺 肺氣盛者肌膚瑩白滑膩髮細黑淺肺氣怯則肌  
膚沮敗若無皮而血凝故寶鑑亦名血凝孫真人言小  
兒出腹肌肉猶是血也漸漸堅化肺主皮膚肺氣不充  
則血沮敗不成肌膚故若無皮毛而血凝面目繞鼻口  
悉黃閉目撮面口中乾燥四支不能伸縮哭無聲不吮  
乳此皮毛不斂也多是育千金治以龍膽湯方具于  
後

治初生兒血凝皮肉不斂哭無聲不吮乳

以胡粉研細酒和塗之乾即愈

又方以白殭蚕為末煎湯適寒溫浴之

又灸法初生兒血凝

以臍四邊各去臍半寸并鳩尾下五處各灸三壯

腎 腎氣盛者顙小而合早牙齒早生腎氣怯者解顙  
而顙不合牙久不生生則不固面慘目睛多白腎主骨  
髓腦為髓海怯則腦髓不成故顙解而不能結解也顙

不差而百病交攻極難將護此最為大病矣又腎主骨  
牙乃骨之餘怯則牙文不生也

治小兒解顱玉乳丹

鍾乳粉

依法煉者半兩

熟乾地黄

依法蒸者半兩

栢子仁

半兩當歸

去蘆半兩

防風

去蘆分判

補骨脂

一分揀淨微炒

或加黃耆茯苓亦

得

右為細末入鍾乳粉栢子仁拌勻煉蜜和丸黍米大  
每服十九煎茴香湯送下乳後

又方

細辛

去苗桂心各半兩

乾姜

七錢半

右為細末以乳汁和傅縫上乾即復傅兒面赤即愈

又方以蛇蛻皮炒焦為末用猪頰車骨中髓調傅縫上

日三一方只用猪頰髓

又方以驢蹄燒灰研細末生油和傅縫上以差為度

治小兒顙不合

生蟹足骨

半兩白歛兩半

右為細末以乳汁和貼縫上

又方以龜甲煮湯適寒溫漬之不得用黑者

治小兒顫不合鼻塞不通

以大天南星微炮去皮為細末淡醋調攤緋帛子上貼之仍炙手熱頻熨立效

治小兒顫不合顫腫顫陷並主之

蛇蛻皮

半兩燒灰細研

防風

去蘆

白芨

大黃

濕紙裏煨紙焦各一分

右為細末入青黛一分同研極勻每用半錢用獾猪膽汁調勻將紙一片依大小長短剪一紙花子攤藥



在上仍於四邊各留少白紙用淡醋糊塗徧以貼病  
上不住以溫水潤動一伏時換一方防風一兩半 栢子  
仁白芨各一兩 為末乳汁和傅顙上十日知二十日愈  
日一易之

又法治小兒解顙顙不合作頭巾與裏遮護之久而自  
合千金云良法也

治小兒齒久不生

以雄鼠屎三十枚日一枚拭齒斷即生其屎兩角尖

者乃雄鼠屎也一云用雌鼠屎

兩頭圓者

又方以黑豈三十粒於牛糞火內燒令煙盡細研入射香少許再研勻細用針挑不生齒處令血出以藥末揩上不得見風忌醋多年不生者用之極效

又方以屏坑中竹木正旦刮屑塗之即生

### 乳母論

兒生自乳養者一切不論若令乳母乳養者必擇其人若有宿疾狐臭癭癭上氣喘嗽疥癬頭瘡龜背駝背鼻

艷紫唇舌和聾啞顛狂驚癇疽癰等疾並不可令乳兒也

凡乳母乃血氣化為乳汁則吾謂善惡悉由血氣所生喜怒飲食一切禁忌並宜戒慎若縱性恣意因而乳兒則令兒感生疾病也若房勞乳兒則令兒瘦瘠交脛不能行若醉以乳兒則令兒身熱腹滿若畜熱乳兒則令兒變黃不能食若怒作乳兒則令兒驚狂上氣若吐下乳兒則令兒虛羸氣弱是皆所忌也

凡每乳兒乳母當先以手按散其熱然後與兒吮之若乳驚汁湧恐兒嚙乳不及慮防槍噎則輒奪之令兒少息又復與之如是數次則可也又當視兒飢飽節度一日之中知幾乳而足量以為常每於早晨若有宿乳須當捻去若夏月不去熱乳令兒吐哕冬月不去寒乳令兒咳利又若兒大喜之後不可便乳令兒驚癇若兒大哭之後不可便與乳令兒吐瀉又乳母不可太飽恐停滯不化若太飽則以空乳令吮則消

凡每乳兒乳母當以臂枕兒頭令兒口與乳齊乃乳之  
不可用膊恐太高令兒飲乳不快多致兒噎又乳母  
欲寐則奪去其乳恐睡著不覺被乳填沃口鼻別生  
其他事又且不知兒饑飽也

凡兒生六十日目瞳子成能識人百日任脉反覆一百  
八十日尻骨成能獨坐二百日掌骨成能匍匐三百  
日臚骨成能獨立三百六十日膝骨成能移步乳母  
常須依時按節續續教引使兒能會此是定法也即

不得常常抱持過時都不教引致令兒筋骨弛墮又恐成腰脚之疾也

慎護論

凡乳母慎護養兒乳哺欲其有節襁褓欲其有宜達其饑飽察其強弱適其禮薄循其寒燠蓋自有道不可不知也

凡兒自初生至滿月宜常常時取猪乳汁滴兒口中令噉最為佳妙又以珍珠末一大豆許用蜜一蜺殼和

之分三次或四次每十日內外與一次塗兒口中安  
心神鎮魂魄

凡兒生肌肉未成不可與煖厚新綿之衣當與故絮帛  
薄衣若與新綿厚煖則蒸燠生熱筋骨緩弱故聖經  
云襁褓者衣欲舊帛綿欲故絮非乃惡於新煖亦資  
父母之餘氣以致養焉

凡乳母若遇天和無風之時當抱兒在日中嬉戲使數  
見風日則血凝氣剛肌肉硬密堪耐風寒若藏幃帳

之內重衣溫煖譬如陰地草木不見風日則脆軟不  
任易為傷損故聖濟經言重衣溫厚幃帳周密宜與  
減損甚則傷皮膚害血脈是生多疾也

凡兒常令薄衣雖冬月但令著兩夾衣及衲衣之類若  
極寒即漸加舊絮衣人家多務愛惜乃以新綿厚衣  
溫養過宜適以為害薄衣之法當從秋習之若至來  
春稍煖須漸減其衣不可便行卒減恐令兒傷中風  
寒



凡兒於冬月須著帽項之衣夏月須著背褡及於當脊更襯綴一重以防風寒所干謂諸藏之俞皆在於背故也又常令乳母每日三時摸兒項後筋兩轅之間名曰風池若熱即須熨之令微汗則愈諺云戒養小兒慎護風池者是也

凡兒於春時不可覆頭裹足致陽氣不得出泄則發熱矣

凡兒常當看覷消息無令身體有汗若汗出則致腠理

虛而受風寒晝夜寤寐皆當慎之須審天氣冷暖衣服厚薄及以粉粉之

凡兒於暑月時常令在涼處勿禁水漿但少少與之唯是不宜多與

凡兒不可抱於簷下洗浴又不可當風解脫恐為寒干又啼哭未斷不可與乳冒冷衝寒不可哺飼恐為食傷又不可近神佛之前驢馬之畔又不可令兒見怪異之物及各門異戶不相識之人恐為客忤

凡兒生三日之外當與少哺姚和衆云以粟米煮粥飲  
研如乳汁每日與半蜆殼許以助穀神導達腸胃孫  
真人云以粳米飲七日外與三大豆許慎不可雜與  
藥喫巢氏云兒生滿三十日後當哺少物如二棗核  
許至五十日如櫻桃許至百日如大棗許若乳少當  
以意增之不可多與恐不能勝別生病矣若乳多不  
消哺食者亦須少少與之以壯腸胃兒大稍稍增之  
當有常劑聖濟經亦云兒生三日用飲過三日用哺

哺之以賴穀氣也哺之多少量日為則如是則五臟得養而胃氣壯矣今之養小兒者多務愛惜過當往往至二三歲尚未與食致脾胃虛弱體力怯軟平生多病若在半年之後宜煮陳米稀粥與之十月以後漸與稠粥爛飯以助中氣則自然易養少病惟忌生冷油膩葷茹甜物

凡小兒乳哺既有常劑若忽爾却乳哺少者此是腹中少有不和也便當與微微下之若都不肯食但飲少

乳者此傷重要下之不可不下也若不與下則生寒  
熱或為吐利及為癖積脉大者發癰皆不早治之由  
也孫真人亦曰小兒寒熱亦當下之乃差又小兒乳  
哺不能無痰癖也常當節適之若稍不進乳食便以  
微藥尅化紫圓最妙方在後不得行駛藥轉利又不  
得為無事而遷延致病大即難治爾小兒微患便與  
微下則損不甚而易愈矣若於春夏之時有疾千金  
云立後切不可妄行吐下及微疾亦不可亂行鍼灸蓋鍼

灸傷經絡吐下損府藏故也若誤行轉瀉則使下焦虛而上焦熱變成大病也故巢氏有言小兒春夏自非甚病決定不可吐下者是也

食忌論

凡小兒有不可食之物不可不知今具于後

小兒不可多食粟子令兒氣弱行遲熟食則氣擁

小兒不可食蕨菜令兒立則無力久不能行

小兒不可食芡令兒不能行

小兒不可食黍米雞肉胡瓜令兒腹中生虫經驗方

云小兒未斷乳食雞肉令兒腹生蛇虫

小兒不可食越瓜令兒發痼疾

小兒不可食麥令兒髮落

麥是蕎麥也

小兒不可食鳧茨令兒臍下痛

小兒不可食鱖魚令兒生癥癖

小兒不可食炒豆猪肉令生氣壅致死

# 大小論

經言六歲已上者為小兒十八已上者為少年據此之言則十八已下者皆為小兒也此乃古之所論爾以今時校之則時世相異理或未當且禮云男子三十曰壯有室又曰男子三十而娶是古之男子皆三十已上方娶故十八以下得為小兒之稱今之時則不然男不過十五而娶至十八已有生一二子者豈得為小兒也以今時言之當以十四以下為小兒治其十五已上者天癸已行婚冠既就則為大人治耳



諸般色澤紋證論

經云小兒六歲已還者經所不載有病難治無承據之  
也詳之此謂嬰兒未能言者有病則無由問其所苦故  
無承據也若能言者必能問之小兒豈有六歲尚不能  
言者哉其不能言者唯一二歲兒也故先賢言嬰兒未  
能言者最為幼小有病則肌膚未全寸關不辨變蒸交  
互氣血細微若憑診切實難明曉惟在觀其形色參其  
證候乃知病之所在者矣其觀視之法須要安神定志

勿令情意惑亂不得於兒哭斷之時睡起之際則色不正矣須於辰時之後巳時之前夏即未熱冬即未溫外色不雜內氣閑雅乃可向明而觀察之也聖濟經曰通識之士必察剛柔勇怯視其盛衰虛實適以寒溫平以陰陽病之輕重緩急隨證以治之不必蔽於難治也諸所論繁紊難以執據今採其當者叙而次之

諸色澤候

面上五臟部分色

左頰主肝右頰主肺額上主心鼻

上主脾

一云唇口

頤上主腎色青為風色赤為熱色黃

為食色白為氣色黑為寒也

面上五藏四時色

經言五藏之色皆外榮於面故死

生疾病係焉肝主春其色青心主夏其色赤脾主長

夏其色黃肺主秋其色白腎主冬其色黑是謂五藏

之色隨四時各榮於面也其色不深不淺應常光潤

者為和平也若色深重者其藏實淺淡者其藏虛

面上五藏生死色

經曰滋榮者其色生青如翠羽赤

如雞冠黃如蟹腹白如豚膏黑如烏羽枯夭者其色死青如草茲赤如衄血黃如枳實白如枯骨黑如炆

煤

面上五藏部分相乘色 肝色青者本色也赤者心乘肝也黃者脾乘肝也白者肺乘肝也黑者腎乘肝也心色赤者本色也青者肝乘心也黃者脾乘心也白者肺乘心也黑者腎乘心也脾色黃者本色也青者肝乘脾也赤者心乘脾也黑者腎乘脾也白者肺乘

脾也肺色白者本色也青者肝乘肺也赤者心乘肺也黃者脾乘肺也黑者腎乘肺也腎色黑者本色也青者肝乘腎也赤者心乘腎也黃者脾乘腎也白者肺乘腎也

面上五藏四時相乘色 經言青赤見於春赤黃見於夏黃白見於長夏白黑見於秋黑青見於冬是謂五藏之生五行相繼也為病輕若肝色見青白心色見赤黑脾色見黃青肺色見白赤腎色見黑黃是謂真

藏之色五行相尅也為病重

面上死生色 內經曰凡病面黃目青面黃目赤面黃  
目白面黃目黑者皆不死聖濟經言脾真為本而面  
黃必生者以真氣外榮故也若面青目赤面青目白  
面青目黑面黑目白面赤目青者皆死謂無脾色外  
榮而真氣已絕故也

鼻上色 聖濟經曰鼻端青為腹冷黑為水氣白為無  
血黃為胃寒赤為有風鮮明為留飲

目內色赤者心熱淡紅者虛熱青者肝熱淺淡者肝虛  
黃者脾熱無精色腎虛

金匱死色 凡小兒病者有黑色滿面或繞口入口或  
延眉繞目或暗人中者皆死有青色延面連目入耳  
者死目無精光眼中有物如橫紅針者死

外臺死色 凡小兒病者面上有青黑色如紗蓋定從  
髮際至印堂者不以疾狀淺深六十日死至鼻柱者  
一月死至人中者十日死滿面者即日死

諸處紋狀候

耳後完骨上有青脉如線三兩路卧不靜者此癰疾候  
當刺搗破令血出以為小治若自腫破者死候也

手大指後白肉魚際之上有筋絡色青黑者胃中有寒  
赤黃者有熱赤青黑雜者寒熱若青而小短者少氣  
又手處手大指第二指之間虎口上有筋脉如線看其  
顏色曲直以訣其病若紋直者是驚曲者是傷沉隱  
為風曲外有冷曲內為食



歌曰虎口青紋直 情知四足驚 黑色元因水

赤乃火飛禽 淡紅人驚發 灣紫有傷尋

外冷內為食 沉隱定風生 長大疾須重

短小得安平 但看叉手處 病候驗虛真

第二指上爪三節名曰三關小兒有男左女右看之有  
八般筋脉紋狀以驗其病名曰八片錦最下一節名  
為氣關有紋過者病纔覺重諸病既生則氣不調順  
故名氣關也

第二節名為風關有紋過者須發驚風漸加困重故名風關也

第三節名為命關有紋過者則病極而命危殆故命關也

魚刺形主初驚在氣關主壯熱吐瀉在風關主初驚纔發在命關驚極難治

歌曰形如魚刺是初驚 遍體如湯面色青  
吐瀉躁煩如似此 通腸和氣便惺惺

垂針形主瀉痢在氣關主傷冷吐瀉在風關瀉傳  
驚風在命關驚傳慢驚風極候

歌曰形如懸針瀉痢多 發驚身熱定違和

此病若變驚風慢 命關已度是沉疴

水字形主肺驚在氣關涎痰咳嗽虛積在風關發  
驚喘哽涎在命關困不治

歌曰形如水字肺家驚 虛積相傳面色青

馬上有涎須與治 命關若過更無寧

乙字形又曰中曲主食驚在氣關主食傷吐痢在  
風關傳變風乙形屬肝肝刑于脾在命關傳慢脾  
風不治

歌曰形如乙曲病因肝 眼慢驚啼瘈瘲偏

冷積為傷傳變此 慢脾風已度三關

去蛇形主內熱外虛 來蛇形主外實內虛

蛇中卷形內外俱虛此數樣皆曲虫又曰曲

蛇在氣關主疳積在風關主勞帶驚在命關不治

歌曰形如蛇曲病因深 脾積疳勞又帶驚

未過二關宜早治 若過三關更莫論

長者弓形短者環形主疳積在氣關吐逆疳熱喫  
泥土在風關疳極羸瘦在命關不治

歌曰形如環弓疳氣黃 好食泥土是尋常

此病早求良醫治 三關已到命飛揚

亂紋形主虫痛在氣關主氣不和有虫積食諸生  
物在風關主虫咬心腹痛在命關病困極難治

歌曰紋亂縱橫虫上尋 曉夜啼號不可憐

神佛求遍都無應 安虫取積得康寧

珠形死候此候不拘三關上下見者皆為死候

歌曰琉珠死候不須醫 便是沉疴莫療之

三關若見都休望 安排後事更無疑

諸紋總歌

魚刺初驚候 懸針瀉痢多 水紋驚肺積

乙樣是肝訛 曲虫驚疳病 環弓一論過

亂紋虫咬甚 琉珠病已疴

五藏主病論

諸形證候

肝藏 肝主風肝病實則目直呌哭呵欠頓悶項急

治當

瀉之肝病虛前牙多欠口中氣熱則外生口中氣溫則

内生 治當補之肝氣則撻衣捻物熱甚則目直不搖風主

動又風淫末疾熱即風動於四末故手撻衣捻物也  
熱入於目牽其筋脉則兩眦俱緊不能轉視故目直

也

治當瀉其心肝

肝有風則目連劓風甚則身反折強直不

搖凡病新久皆引風風動止於頭目目屬肝風入於

目則目上下左右如風之吹不輕不重兒不能任故

目連劓也風甚則風入於筋脉筋脉緊急故身反強

直也

治當瀉肝補腎

肝有熱有風甚則皆兼驚證不搖者謂

未得心熱故也若心熱乘於肝則子母皆有實熱風

火相搏而乃發搖其抽掣之勢如風蕩火也

治在驚疾門之

中若肝熱搦衣捻物壯熱飲食喘悶者肺乘之也

治當



肺瀉肝於四時冬相春王夏衰秋絕若在春肝王之時

早晨亦同

反見肺病乘肝者是肺強肝怯也

治當瀉肺補其腎今肝虛

補腎者母能令子實也甚則直補其肝或子母補之俱補

輕者肺病退則愈重者

目中淡青必發驚若更有赤者當發搐也謂怯則目

淡青色有心熱則赤故當發搐肝虛實皆生風若外

感生者則呵欠頓口中氣熱

治當發散

若能食飲水不

止者當微下之餘不可下也

心藏 心主驚心病熱則叫哭發熱飲水惕跳上竄發

金匱要略卷之二  
病虛實皆主熱心實則喜仰卧謂心氣實則氣上行  
治當  
補之

病虛實皆主熱心實則喜仰卧謂心氣實則氣上行

澁若合面卧氣則不通快故喜仰卧使氣得上下通

也  
治當  
渴之心熱則視其口中氣溫或合面卧而就冷及

上竄咬牙也謂心熱則胃亦熱兒雖不能言有就冷

之意故合面卧也  
治當  
渴熱若邪熱乘心則為驚啼  
治當  
安神

心於四時春相夏王秋衰冬絕若在夏心王之時  
中日

亦反見腎病乘心者是腎強心弱也  
治當  
補其肝心  
渴其膀胱今腎

強而瀉膀胱者謂腎主虛而無實  
瀉其膀胱之府則藏不得盛也  
輕者腎病退則愈

重者悸動不已當發擣也

脾藏

胃附

脾主困脾病實則困睡身熱飲水能食

治當下之

脾病虛則身溫四支冷吐瀉生風

治當補之

脾寒者夜啼

脾屬陰冷即夜間發痛故兒啼哭

治當溫中

脾熱者弄舌

脾熱則舌絡緊故時時舒吐也或時飲水熱則津液

少故也

治當分解其熱

不可用涼藥下之加面黃肌瘦五心

煩熱則為疳也

治在疳疾門中

若不因脾熱大病未已弄舌

者凶也又脾藏冷熱皆主吐瀉困倦若吐乳色黃者傷熱吐乳色青者傷冷四時之間秋冬春三時皆冷多唯夏暑時有熱多

胃附 胃熱者若吐瀉昏睡露睛者虛熱也若吐瀉昏睡不露睛者實熱也胃久虛熱多生疸病胃冷者若吐痰沫白綠水不食腹痛或瀉青白痢穀不化者胃虛冷也若胃虛怯有汗者但上至項下至臍也若面恍白無精光口頻撮口中氣冷不思食者胃不和也

又小兒筋骨未成血脉未全自小多啼哭者胃啼也

脾胃二者腑臟表裡人之司命故同病也脾於四時

王在四旁

證四月

若於王時反見他藏病乘脾者是脾

弱也

如春季三月木位土王之時見肺來乘之秋季月金位土王之時見肝來乘之之類是也他放

之治當補弱為強隨証治之

輕者所乘之藏病退則愈重者面目

赤黃脾怯也

肺藏 肺主喘肺病實則身溫悶亂氣促喘急

治當瀉之肺

病虛則身熱哽氣長出氣

治當補之

肺熱則手陷眉目鼻

面甚則吐稠涎及咯血者久則肺虛

治當補之

若虛熱則

唇深紅色

治當解熱

若實則涎痰潮吐

治宜下涎

肺氣盛而熱

又復有風冷者則胷滿短氣悶亂喘嗽上氣

當先治肺後散

風冷若肺只傷風者不胷滿也

但只散風

又肺有虛實寒熱

咳嗽者

並於咳嗽門論之

肺於四時夏相秋王冬衰春絕若

在秋肺王之時

日迭時同

反見肝病來乘肺者是肝強肺

怯也肺怯則唇色白若病而悶亂氣麤喘促哽氣者

難治為肺虛損也唇白者謂肺脾病久也脾為肺之

母母子皆虛不能相營也故名曰怯

治當補脾肺而瀉其肝也輕

者肝病退則愈重者唇白枯者死白澤者吉

腎藏 腎主虛腎病無實唯斑瘡腎實則變黑陷餘無  
實病虛則身冷無精光畏明體骨重蓋腎氣不足則  
下竄而骨重惟欲墜於下而縮身也又腎屬水陰也  
虛則畏明若因他病致腎虛者非也又腎虛者謂本  
怯由胎氣不成精神不足目中白睛多面恍白無光  
多解顱此皆難養縱長不過八八之數若恣色欲多

不及四十而亡也

治並當補之

腎於四時秋相冬王春衰

夏絕若在冬腎王之時

夜半同

反見心病來乘腎者是

心強腎弱也

治當瀉心而補腎

輕者心病退則愈重者下竄

不語腎怯虛也

凡病必視其新久虛實假令肺病又見肺證若前牙多

欠者則易治謂肝虛不能乘肺也若目直呌哭項急

頓悶者則難治謂肺病久則虛肝強而實反勝其肺

也虛則補其母實則瀉其子又病必視其五藏衰王



時候參其相乘勝負虛實其順易治

微邪是也

逆者難治

賊邪是也五藏相反隨證治之

凡病先虛或已經下之有合下之者必先實其母後下其子也假如肺虛而痰實此可下之證當先益其脾後乃瀉肺也諸病放此

凡病有熱者或踈利解化之後無虛證者勿得用溫補之若用之熱必隨生

諸死絕候

喬岳五藏絕歌

心藏 吐瀉變為痢血黑渴難當

心主血心絕則血色變黑虛燥而發渴

肌瘦難行坐虛舌不縮藏

心主舌絕則不能收

兩臉如脂赤

痢久

則面當無色今面色反如脂者心絕則虛陽上發也

無語口生瘡

心主舌絕則不能語

若

向夏中得更莫細思量

肝藏 眼目時時澁渾身似醉人頻頻只要睡心煩又

多嗔

肝主目絕則不能開故澁而又肝主怒絕則多怒力絕則如醉人不能舉也

不止也唇白眼胞腫狂躁足啼聲東方應此候病則不

宜春

脾藏 面色黃時好不可見相傳體弱增寒甚虫行覓

食食

脾主支體絕則體弱又脾絕則腎逆乘之故發憎寒脾絕則胃熱故虫不安而上吐出

喫

乳唇無力齒露蓋時難

脾主唇絕則不能收掩其齒又不能吮乳

眼傾休

下藥

眼眶屬脾絕則傾陷

免更住人間

肺藏 肺候應白色莫使見絕形鼻青孔燥黑腹脹眼

胞傾

肺主鼻絕則肝逆乘之而色青又肺絕則無涕故孔黑燥也肺主眼胞絕則陷之

項直

喘氣急背凸沒迴聲

肺主氣絕則喘急項直以引氣也氣絕則背中滿凸但有出氣

而無迴氣也

秋間逢此候四方別托生

腎藏

冷汗時時有尿多夜裏驚

腎絕則陰陽相離故冷汗出而小便不禁

精者神之舍絕則精神離故夜裏多驚腎屬陰夜亦屬陰故也

遍身生粟疥手足冷

如水

陽盡不能充煖故也

項倒頭難舉面黑沒精神

腎絕則天柱骨倒面

目皆黑無精神也

此候應壬癸冬得殞其身

王叔和死證歌

眼上赤脉下貫瞳人顙門腫起兼及

作坑鼻乾黑燥肚大青筋目多直視都不轉睛指甲

黑色忽作鴟鳴虛舌出口齧齒咬人魚口氣急啼不

作聲虵虫既出必是死形用藥速急十無一生

錢乙死證 瀉不定精神好 大渴不定止之又渴

吹鼻不噴 病重口乾不睡 時氣唇上青黑點

頰深赤如塗胭脂 鼻孔開張 喘急不定 面有

五色不常不澤

諸般死證 病困汗出如珠不流 頭毛上逆 唇口


枯乾 口鼻冷氣 頭足相抵 卧正如縛 四支

垂痺 手足掌冷

通真子死候歌

顙陷唇乾目直視  
口中冷氣卧如痴

身形强直手足軟  
掌冷頭低盡莫醫



小兒衛生總微論方卷二

# 欽定四庫全書

子部

小兒衛生總微論方卷三

四

詳校官太醫院恩糧<sub>臣</sub>袁大錫

編修臣倉聖脉覆勘

總校官進士<sub>臣</sub>繆琪

校對官中書<sub>臣</sub>李斯咏

謄錄監生<sub>臣</sub>王試

欽定四庫全書

小兒衛生總微論方卷三

變蒸論

小兒在母腹中胎化十月而生則皮膚筋骨腑臟氣血雖已全具而未充備故有變蒸者是長神智堅骨脉也變者易也蒸者熱也每經一次之後則兒骨脉氣血稍強精神性情特異是以聖濟經言嬰孺始生有變蒸者以體具未充精神未壯尚資陰陽之氣水火之濟甄陶



以成非道之自然以變為常者哉故兒自生每三十二  
日一次者以人兩手十指每指三節共骨三十段又兩  
掌骨共三十二段足亦如之以應之也太倉公曰氣入  
內支長機骨於十變者乃是也聖濟經又曰變者上氣  
蒸者體熱上氣者則以五藏改易而皆上朝藏真高於  
肺也體熱者則以血脉敷榮陽方外固為陰使也故變  
蒸畢而形氣成就者也亦由萬物之生非陰陽氣蘊熱  
蒸無以榮變也兒自生三十二日為第一變者屬腎又

三十二日再變且蒸者屬膀胱腎與膀胱為表裏共六十四日也其變則耳與骭骨皆冷者腎為水水數一故為變蒸之始也又三十二日為第三變屬心又三十二日為第四變且蒸屬小腸心與小腸為表裏共一百二十八日也其變則汗出而微驚者心為火火數二故為變蒸之次二也又三十二日為第五變屬肝又三十二日為第六變且蒸屬膽肝與膽為表裏共一百九十二日也其變則目不開而赤者肝為木木數三故變蒸之次

三也又三十二日為第七變屬肺又三十二日為第八變且蒸屬大腸肺與大腸為表裏共二百五十八日也其變則皮膚熱或汗或不汗者肺屬金金數四故為變蒸之次四也又三十二日為第九變屬脾又三十二日為第十變屬胃脾與胃為表裏共三百二十日也其變則不食腹痛而吐乳者脾為土土數五故為變蒸之次五也後又六十四日復一大蒸四次積二百五十六日大蒸畢凡五百七十六日大小變蒸數足其血脈充榮

則手受血而能握足受血而能步此亦手足之應也其  
變蒸之候體熱微驚耳冷骭冷上唇頭有白泡起若魚  
目珠子脉亂或汗或不汗不欲食食則輒吐目白者重  
目赤黑者微閉而不開至變蒸了自然明矣其輕者五  
日而衰重者十日而衰或先期五日或後之五日或十  
日之中熱乃除耳若熱甚違日不歇不得驚動勿令傍  
邊人多而語雜不可妄行灸刺但少與紫丸微利之則  
熱便止矣或用孫真人肘後黑散子粉香散調治亦可

唯不可餘治若傷寒時行溫病及驚風熱溫壯等候雖與  
變蒸頗皆相似耳熱骹熱唇上無白泡珠乃為他病各  
從其證為治若於變蒸內有寒加之寒熱交爭臍腹大  
矯啼不止者熨之則愈

變蒸賦

看病嬰兒先明四時既有變蒸之狀還如溫壯之推寒  
熱初來慎一匕而方退周期未滿當四八以重期原夫  
魂魄將成筋骸始榮開舒腠理通徹奇經運用而陰陽

以正往來而血氣初平頓覺精神嬰嬰全然有異未知  
蒸變一一子細須明肝者幹也東方所屬為木象之三  
數發形証於兩目渾身壯熱令瞳子以無輝遍體昏沉  
為神魂而未足四數於金二由在火咳嗽頻頻汗珠顆  
顆兩日間嚏噴仍加數夜裏虛驚又可暗增骨髓學反  
復以番身漸長性情畏傍人而戀我脾土五呼腎水一  
稱穀氣暗引精志時增乳哺甘甜尻骨成而獨坐戲經  
絡流利掌骨具而匍匐能次後筋脉之稍更膝踝之漸

變氣象而榮於四肢光彩而滋於滿面亭亭立猶未穩  
嘍嘍語尚聲顫手足受血移步行而堪憐耳目通神意  
智生而可羨斯由呼吸以定肌體乃厚兩氣而外陽內  
陰一息而入鼻出口期來應節自然腑臟充盈將養垂  
宜致得風邪甚有於是髮豎無潤乳呬吐口珠起丹唇  
冷浸聃耳或腸鳴而微利或驚啼而勿喜經云蒸即蒸  
血肉之堅變即變形神之正矣

治方

紫九治小兒身熱變蒸不解及溫壯傷寒乳哺失節宿滯痰癖腹滿吐衄便利不調等疾亦治食癆先寒後熱

代赭石

火煨醋  
淬十次

赤石脂

各一兩

巴豆

三十箇去  
皮心油

杏仁

五十粒  
去皮尖

右上式味為細末下二味搗成膏相和更杵二千下  
相得若硬入少蜜同杵作劑密器中收之三十日兒  
服麻子許分圓乳汁送下候食頃之後方與少乳勿  
得多與至日中當小利即熱除若未除明旦更一服



百日兒小豆許以此準量加減夏月多熱喜令發疹  
每二三十日輒一服甚佳

黑散子治嬰小身熱變蒸不解及挾時行溫病

麻黃

去根節二分

大黃

一分杏仁一分

去皮二分和皮用

右都燒存性為細末每服壹字或半錢量大小加減  
以水半銀盞煎少許須抱兒於煖溫避風處連進二  
三服取微汗候身涼以粉香散撲之一方只炒黑用  
粉香散

蚌粉

不以多少研極細水飛過

射香

少許研

右勻末用綿裏撲粉兒身如已涼胃氣未和不快美

乳服觀音散

方在後

熨法治小兒變蒸內有寒加之發寒熱交爭臍腹大矯而痛啼不止

竈中灰 食塩

右二味量其相等和勻炒令熱以重帛裹適溫熱熨兒仍不可太熱恐驚烙兒也

已上凡兒於變蒸之內若遇身熱脉亂汗不出不欲乳食乳食後輒吐者必審其日數度是變蒸之時者雖有是證無所苦也 陳知軍云小兒變蒸但以四君子湯加茯神與服其方白朮人參茯苓茯神各半兩甘草炙三錢同末薄荷湯調下一錢慎不可餘治及服驚藥恐冷傷胃氣也

脉理論

凡兒稟受臟腑氣血榮衛形體雖有生皆全然於未語

之前變蒸之際則血氣未充膚革未固筋骨未堅脉狀未成若有病也難為診切又難訪問是以先賢言嬰小之病難治者以無承據也故立其觀視形色之法焉兒自生積五百七十六日大小變蒸數畢則氣血榮精神異筋骨壯脉理全然後方可診切又能言問也或以謂小兒之脉與壯老不同者是不達診治之大體也凡脉之長短遲速在因形以別之不必拘於至數經言小兒脉多雀鬩要以三部為主其脉小數小細者平也諸家

所言甚衆今擇其當者具之孫真人云小兒之脉固難分表裡今撮其要者不出數條

總目歌曰

小兒有病須憑脉 一指三關定其息

浮洪風熱數為驚 虛冷沉遲寔有積

浮脉為風秋得之曰平餘時得之主傷風寒頭疼壯熱或夜熱晝涼咳嗽嚏噴鼻塞清涕嘔逆不食

歌曰

浮為風兮秋日平 餘中風寒頭目疼

壯氣夜極鼻清涕 嚏噴呾嗽吐食頻

洪脉為熱夏得之曰平餘時得之主風熱壅盛身體溫  
壯瘡瘍血泄

歌曰

洪為應候夏時和 餘須發熱壯溫多

風壅作驚或瘡腫 有時泄下血滂沱

數脉為驚春得之曰平餘時得之主驚風抽掣脉數小

者多睡惕跳直視怕怖盜汗非時咬牙吐舌微吐喘息  
脉數大者一兩日間發搐搦也

歌曰

數為驚候春日長 餘時小數睡驚揚

喘息直視舌頻吐 大數潮搐發沈殃

沉遲為虛冷冬得之曰平餘時得之主脾胃虛弱泄瀉  
滑腸脫肛吐痢不止日漸尪羸以成脾困或作疳勞

歌曰

沉遲之脉冬日安 餘時脾胃弱虛言

泄瀉滑腸肛脫出 吐利疝羸瘦變疳

寔脉為積滯四時得之皆主食傷積聚面黃腹脹髮焦  
煩渴吐衄腹痛

歌曰

寔脉含傷積滯言 壯熱腹脹髮毛乾

吐痢肚疼或為癖 四時無異一般看

寶鑑四時脉謂春弦夏洪秋浮冬沉四季緩各推其王



相表裡以察其病假令春得弦而浮者病在表在腑  
為陽為順病則易治若得弦而沉者病在裏在臟為陰  
為逆病則難治餘時放之

王氏脉歌曰

小兒乳後輒吐逆 更兼脉亂無憂慮

弦急之時被寒纏 脉緩即是不消乳

緊急細駛亦少苦 虛濡邪氣驚風助

痢下宣腸急痛時 浮大之脉歸泉路

脉經曰小兒之脉駛疾一息七八至曰平不及曰損太過曰至

通真子歌曰

小兒三歲至五歲 呼吸須將八至看  
九至不安十至困 短長大小有邪干

又曰

小兒脉緊是風癇 沉脉須知乳化難  
腹痛緊弦牢寔捻 沉縮有熱在骨間

死証脉 脉來三動而止不見者死 脉來速如弦硬  
直者死 脉來瞥然不見者死

歌曰

三動而止不來凶 速硬如弦勁在弓  
瞥然至而反不見 皆為死脉定由宗

諸般病脉 脉弦者為風寒 弦數者為瘧 脉急者為  
氣不和或為客忤 脉緊者為痛 緊數者驚癇 脉  
浮者為風 浮緊者驚風 浮大者傷寒 浮虛者盜

汗浮數者風熱 脉伏者為氣滯 脉緩脉細者皆

為冷為乳不化 脉虛脉濡者為虛弱為驚 虛濡者

慢驚風 虛緊者伏熱 脉沉重者為有積 沉數者

骨間冷

一云骨間熱

沉遲者虛冷 沉緩者傷食 脉牢

緊者癖聚 牢寔者腸秘 心脉滿大肝脉小急者驚

癰 心脉數小者疳淋 數急者熱 寸口脉直上直

下者為驚 寸口脉大小脉不勻亂者變蒸 左手寸

口無脉心痛中熱嘔逆口瘡或啞嗽喉中哽聲頭汗出

而熱此乳母食冷以乳兒所作也又脉亂者吐逆右手寸口無脉胸滿短氣吐逆噫噦喉中響此乳母抱兒衝風冒風寒所作也凡脉如雀啄而緊者風癇凡脉大小不依部次者惡候凡小兒脉駛呼吸八至曰平九至曰病十至曰困凡小兒脉虛者病亦虛輕手得也脉寔者病亦寔重手得也故急驚脉促急慢驚脉虛微

諸身熱論

凡小兒有病皆須身熱其證不一今條而具之小兒於某時間發熱過時即退至來日依時發熱晝夜同此為潮熱欲發驚也

小兒身熱但一向壯熱不已者此為壯熱甚則發驚也  
小兒身熱但溫而不甚壯熱此為溫熱

小兒身熱口中氣熱叫哭無時呵欠煩悶面目青色此為風熱甚亦發驚

小兒身熱飲水悸惕手足搖動上視弄舌印內青筋見

掌中赤怕物生涎此為驚熱

小兒身熱面赤時久不退睡覺顛抖氣急發渴胸高涎壅此為積熱與壯熱相似但胸高涎壅為異乃臟腑積蘊熱毒三焦鬲腕壅滯也又搖頭項鞭者亦三焦鬲腕壅也已上皆甚則發搐

治在驚  
癇門中

小兒身體發熱氣促鼻塞清涕嚏噴寒毛立眼淚出或出痰水此為傷寒

治在傷  
寒門中

小兒身熱時發時退退但壯熱或夜發熱面黃腹脹吐

瀉乳食不化糞酸臭異常此為食傷

治在傷食門中

小兒夜發熱曉即如故多涎喜睡此肺虛發熱也此與食傷夜發熱相似須要識之况二證餘候各皆不同食傷者可下肺虛者不可下下之則失津液發渴引飲昔錢乙治朱監簿子五歲夜發熱曉即如故衆醫作熱以涼藥解之不愈其候多涎喜睡又以藥下其涎病益甚至五六日大分飲請乙治之乙曰不可下乃取白朮散煎湯三升使任意取足服朱曰飲多不作瀉否乙曰無生水不能作瀉



縱利亦不足怪但不可下耳朱又曰先治何病乙曰止

瀉治痰退熱清神皆此藥也服盡又作兩次與服其子

不渴無痰又投阿膠散二服而安是此証也錢乙方本

集載之小兒每早食後發熱至夜則涼此為血熱

治方在後

小兒身熱形瘦多渴飲食不為肌肉此為疳熱

治在疳門中

小兒血氣旺盛發渴引飲大便黃緊小便赤少四肢身

體翕然而熱此為胃寔熱也

小兒身熱微驚耳冷骭冷上唇頭有白泡起如魚目珠

子或汗或不汗此為變蒸

治在變蒸門中

小兒身熱昏睡驚悸喜噎噴耳尻冷此為瘡疹候

治在瘡疹

門此與食傷變蒸相似傷寒耳尻皆熱變蒸唇上有白疣泡珠子為異

小兒身熱者更有内外在內者多飲水得之在外者多因風寒得之錢氏有云小兒身熱飲水者熱在內身熱不飲水者熱在外此大槩之驗也在內者宜下之在外者宜散之若小兒積蘊内外傷感表裏渾身俱熱頰赤

口乾小便赤大便焦黃少者先以四順清涼飲子利動  
藏府熱即退矣既而復熱者是裏熱已解而表熱未去  
復以惺惺散或紅錦散加麻黃微發其汗表熱乃去既  
去又復發熱者世醫盡不能曉再下再表皆為不可誤  
傷多矣此表裏俱虛氣不歸元陽浮於外所以再發熱  
也但以六神散和其胃氣則收陽歸內身便涼矣

間孝忠論小兒壯熱傷風溫疫傷寒風熱瘡疹傷食率  
皆相似未能辨認之間但與升麻葛根湯惺惺散小柴

胡湯服之甚驗蓋此數藥通治之不致誤也惟傷食者則大便酸臭乳不化畏食或吐宜與微下之

孫真人論小兒內外氣盛眠時小驚或微覺傷風傷食又慮變蒸身熱者但以紫圓

方已在前  
變蒸門下

或龍膽湯為治

此二藥無所不療雖微利動以減盛氣亦不虛人小兒糞黃而臭者此腹中有伏熱也宜服龍膽湯若糞白而酸臭者此挾寒不消也宜服紫圓但少與令內消甚者小增令微稀澇皆須節乳哺一兩日令胃氣平和若不

節則病易復復則復下傷其胃氣令腹脹滿若至再三下之則過傷矣

諸治方

治小兒潮熱溫壯勝金散

雄黃

錢一水飛

白附子

半錢

甘草

半兩炙

芍藥

半兩

十沸水煮乾南

星

半兩炮

荊芥穗

一分

右為末每服半錢水一小盞入薄荷三葉煎至五分蓋去滓溫服無時

治小兒潮熱發躁金花散

川大黃

一兩

秦艽

去蘆  
半兩

右為末每服一字或半錢水一小盞入青蒿三兩藥  
葱白二寸同煎至五分盞去滓溫服若變骨蒸勞氣  
用童子小便浸青蒿葱白煎藥

治小兒潮熱減食蒸瘦秦艽散

秦艽

去蘆  
切焙

甘草

炙各  
兩

乾猫兒

薄荷葉

半兩  
切焙

右為末每服一二錢水一中盞煎至五分盞去滓食後溫服

治小兒虛熱潮作亦治溫壯及解傷寒地骨皮散

知母

柴胡

去蘆

甘草

炙

半夏

湯洗七次切焙

人參

去蘆頭

地

骨皮

去骨

赤茯苓

去黑皮

各等分

右為末每服二錢水一盞生姜五片煎至六分去滓

食後溫服量大小加減

治小兒溫壯身熱臉赤煩渴燥悶涼肌圓

龍膽草

去蘆二兩

玄參

去蘆一兩

當歸

去蘆洗淨一兩

右為細末煉蜜和圓菴豆大每服二十圓竹葉湯下

兒大增之無時

治小兒溫壯風熱牛黃膏

寒水石

四兩煨出火毒

雄黃

一兩水飛

山梔子仁

一錢半

甘草

一分

灸牙消

一兩

鉛白霜

半兩

右為細末入射香少許煉蜜和旋取皂子許薄荷水化下乳食後

治小兒溫壯風熱睡卧不穩咳嗽喘急剋效散

龍腦

一兩

薄荷葉

一兩

白殭蠶

去絲嘴半兩微炒

玄胡索

去皮半兩



右為末每服半錢或一錢蜜湯調下無時

治小兒風熱驚熱眠睡不安鎮心丹

此胡御帶秘方許宣贊傳

鐵粉一分蛇黃一兩

煨七次

醋代赭石

半兩煨醋

馬屁字

半射香一分

別研

右為細末煉蜜入糊圓如小豆大每服一粒磨剪刀  
鑲水化下食後亦治驚癇發搐

治小兒風熱昏塞躁悶不食梨汁粥

右以鵝梨三枚切碎以水二升煮取汁一升去滓入

粳米一合煮粥食之

治小兒驚熱如火亦治溫壯龍齒散

右以龍齒為末調服或以爛龍角研濃汁服一二合  
又方人參牛黃散

右以人參牛黃等分為末以薄荷水調下最佳

又方治如前

右以竹瀝二合溫之分三四服無即刮竹茹以醋煎  
溫服

治小兒積熱啼叫三焦壅滯青金丹

青黛

四兩

甘草

二兩生末

蟬殼

去足一兩末

射香

一錢研

辰砂

一分

研水飛

牛黃

別研

腦子

各三銖

龍齒末

半兩

天竹黃

半兩

右為細末以飴糖和圓雞頭大每一粒分四服溫水

化下無時

治小兒積熱痰寔三焦蘊毒及風熱面赤大小便秘澀

犀角圓

生犀末

一分

人參

去蘆半兩

黃蓮

去鬚一兩

枳寔

去穢半兩炒

檳榔

半兩 大黃

二兩酒浸切片以巴豆一百個去皮貼在大黃上紙裹飯上蒸三次切碎炒黃焦去

巴豆只用大黃

右為細末煉蜜和圓如麻子大每服一二十圓臨卧時熟水下未利加圓數踈導極穩

治小兒諸熱四順飲子

地骨皮

去骨防風

去蘆井又枝

山梔子

去殼取仁

連翹

各等分

右為細末每用一錢或二錢水一小盞入燈心竹葉少許煎至五分盞放冷服無時

治小兒諸熱甘露散

牙消

一分

龍腦薄荷葉

一分

大黃

半兩

甘草

半兩

芍藥

兩

雄黃

一分

水飛

右為末每服半錢蜜水調下無時

治小兒諸熱煩躁牛黃散

右鬱金大者濕紙裹慢火煨熟為末入牛黃少許冷

水調下大者一錢小者半錢無時

治小兒身熱不痊

右以熟湯研郁李仁如杏酪一日服二合

又方

右以雞卵一枚和白蜜服之

小兒於立夏之後有病身熱者慎勿妄為吐下但以除熱湯浴之除熱粉粉之赤膏摩塗之出千金

除熱湯

右以白芷根苗苦等分為麋散用清漿水煎更入鹽少許以浴兒畢用粉粉之

又方

白芷苦參秦皮煎湯或無衆藥但得一味煮湯皆可

又方

右切李葉一升水七升煎至五升適溫煖用之澡浴  
或只用楮葉亦可

涼肌粉

右以白芷楓葉藁本苦參黃連等分為末每用三錢  
以蛤粉二大塊同研勻細入生絹袋子每浴了以撲

身遍令勻亦治夏月伏喝遍身生赤痱子用之極妙  
赤膏

丹砂 雷元 芒硝 戎鹽 大黃

各三兩

右切碎用苦酒半升浸四物一宿以煉成猪脂一斤  
煎三上三下去滓入芒硝成膏每用以摩心下及塗  
臍中

治小兒血熱早食後發熱至晚則涼猪膽圓

胡黃連 宣黃連

去須各半兩

赤芍藥

一兩



右為細末以獺猪膽汁和成劑却入在膽皮中懸鉋  
上用漿水煮勿令漿水入煮熟取出圓如菉豆大每  
服三十圓米飲湯下食後臨卧日三有生瘰癧一證  
亦早食後身熱頗相似但以鼻衄泄瀉宜審辨之  
牛黃膏治小兒疳熱引飲亦治傷風溫壯

雄黃

研水飛

甘草末

川喏硝

各一分

鬱金末

錢腦子

一錢

寒水石

生一兩飛研

菉豆粉

半兩

右同為細末煉蜜和成膏每用半皂子大薄荷湯化

下食後

治小兒裏熱頭昏頰赤口內熱小便赤大便少要微挨動藏府即安四順清涼飲子

又治睡卧不寧五心煩熱四肢抽掣及乳哺不節并寒溫失度熱久連綿欲發驚癇目赤口瘡瘡疹餘毒

大黃

濕紙裹煨熟一方生用

當歸

去鬚洗

赤芍藥

甘草

炙各等分

右為末三歲上兒每服一錢水一盞煎至七分盞分二服更量大小加減食後溫服

治小兒外熱要微發汗即愈惺惺散良方名桔梗散治  
小兒風熱及傷寒時氣瘡疹發熱等

桔梗

去蘆

細辛

去苗

人參

去蘆

甘草

炙

白茯苓

去皮

瓜蒌

根 白朮

各等分

右為細末每服一錢匕水一小盞入薄荷三葉同煎  
至六分去滓溫服凡傷寒溫壯變蒸瘡疹未辨時可  
服

治小兒風濕體熱頭目不清紅錦散

白殭蠶

去絲嘴  
二兩

天麻

一兩

天南星

二兩薄切作  
片子油煤黃

蘇木

節

二兩半  
別研

右為細末每服一錢水一小盞入綿少許同煎至五  
分盞去滓溫服若傷風有表証發熱者於本方中入  
去節麻黃半錢同煎若裏熱心躁燥煩渴者入滑石  
末半錢同煎

治小兒發熱已經汗下仍熱者六神散

人參

去須

白茯苓

去黑皮

乾山藥

白朮

甘草

炙白

扁豆

右為細末每服一錢水一小盞入棗一枚擘破生姜三片同煎至五分盞通口服此藥用處甚多治胃冷加附子治風証加天麻治諸痢加罌粟殼若服之熱猶未退更與銀白散治之

銀白散

乾山藥

白朮

白茯苓

去黑皮各半兩

知母

人參

去蘆

白扁豆

甘草

炙

升麻

各一分

右為細末每服一錢水一小盞棗一個同煎至五分  
盞溫服無時

治小兒溫壯驚風及傷寒身體發熱或作瘡疹於初身  
熱未辨之間並宜服此升麻葛根湯

乾葛

細剉

升麻

芍藥

甘草

炙各等分

右為麤末每服二錢水一小盞煎至五分盞去滓溫  
服無時

治如前小柴胡湯

柴胡

去苗  
二兩

黃芩

人參

去蘆各  
三分

半夏

六錢  
浸七次

甘

草

三分  
炙

右為粗末每服二錢入生姜三片棗一枚水一小盞  
同煎至五分盞去滓溫服無時

治小兒自出腹來血氣寔盛發熱不歇及食不消變蒸  
不解客忤鬼氣溫壯寒熱并諸驚癇悉皆主之

龍膽湯

龍膽

去蘆

鉤藤

柴胡

去蘆

黃芩

桔梗

去蘆

芍藥

茯

神去甘草

炙各一分羌蜋

二个去翅足炙焦

大黃

一分剉碎微炒千金一兩

疑太

右為粗末每服一錢水一小盞煎至五分去滓溫服  
無時

治嬰小壯熱未能服藥者粉方

寒水石 芒硝 滑石 石膏 赤石脂 青木

香 大黃 甘草 黃芩 防風

去蘆枝

芍藥 麻

黃根

各等分



右為末每用藥末三合入牡蠣粉一升細蛤粉亦可  
相和再羅細用以粉兒日二次

桔梗治小兒風熱溫壯或傷寒時氣瘡疹未發並宜服  
之仍煎小黑膏服尤善

桔梗

去蘆

細辛

去苗

人參

去蘆

桔萸根

白朮

甘草

川芎

白茯苓

去黑皮  
各等分

右為末每服二錢水一盞入生姜三片薄荷三葉同  
煎至七分盞三歲已下兒作四服無時

小兒膏

川烏

南星

各一枚  
大者

右入一小瓶子內用濕紙密搭封口慢火燒之候火滅取出削取中心所存白處如梔子大用之須燒數枚擇中度者方用為末次入薄荷葉玄參末各五錢匕研勻煉蜜和成劑每用旋攪豆許圓之葱白湯下頻頻服若筋脉或緩或急加乳香同葱白湯下之

治小兒發熱極甚因伏留心經昏冒不省或誤服熱藥

畜熱所致用之神效

以生梅花腦子半字或一字取新殺猪心中血一兩  
滴同研作一圓新汲水少許化下大良未省即再服  
一粒

治小兒驚熱

以水磨犀角汁服之

薄荷散治小兒風熱溫壯及傷寒傷風瘡疹未辨之間  
皆可服之

薄荷葉

藿香葉

去土

荊芥穗

甘松

去土

白芷

防

風

去蘆并  
叉枝

川芎

桔梗

去蘆

白殭

去蟲  
嘴

甘草

炙  
藁

本

去土各  
一兩

細辛

去苗  
半兩

右為末每服一錢茶調溫服亦治大人風氣不順頭面風等疾大能清利頭目止昏眩聰明耳目

小兒衛生總微論方卷三